

LA CARTA DE SANTIAGO

¹ Che co jae Santiago. Che co jae Tumpa jare ñandeYa Jesucristo jembiócuai. Aicuatía ai cuae tupapire doce atí Israel pegua oñemoai ñogüínoi vae reta pe. Tumpa ndiveño pei.

Aracuaa Tumpa omee vae

² Cherívi reta, amo pe yavai yae peve peico cavi vaera Tumpa cotí. Erei jocorai yave, peyerovia yae. ³ Echa peicuua co quirai mbaembae pemboavai vae oicuauca peve ipirata co peporogüirovia. Jare cuae peicuua yave, pepiaguasu ocuacuua. ⁴ Erei pemaéño pepiaguasu re ocuacuua cavi vaera, pepiaguasu yae vaera. Jocorai yave, ngaraa mbae oata peve. Peyeócuai cavita Tumpa pe. ⁵ Oime yave quia aracuaa oata chupe vae, toyerure Tumpa pe jese. Echa Tumpa oipota yae omee aracuaa metei ñavo pe. Ngaraa oñeengata quia pe mbaeti aracuaa güínoi rambue. Omeeta co aracuaa chupe. ⁶ Erei toyerure Tumpa pe jese mborogüirovia reve. Agüíye toyerure chupe jese mborogüirovia mbae reve. Echa oyerure chupe jese mborogüirovia mbae reve vae iaparúa i guasu pe oi vae rami co. Echa ivítu oyepeyu yave, cotícotí güíraja. ⁷ Jocuae oyerure ñandeYa Tumpa pe aracuaa re mborogüirovia mbae reve vae agüíye toñemongueta Tumpa omeeta co mbae chupe. ⁸ Echa yepe tei oyerure Tumpa pe mbae re, erei mbaeti güírovia Tumpa

omeeta co chupe. Jocuae nunga mbaeti etei oicuaa mbae oyapo vaera.

⁹ Metei oporogüirovia vae paravete vae toyerovia jeta Tumpa omee chupe vae re. ¹⁰ Erei oporogüirovia vae oicocatu vae toyerovia Tumpa omomichi rambue. Echa yepe tei oicocatu, erei omanota co metei mbaepotí omano rami. ¹¹ Cuarai jasi yave jare iñitu jacu ou yave, ñana ipiru jare mbaepotí reta omano. Mbaeti ma ipora. Jae ramiño vi oicocatu vae güíramoiño omanota.

Ipiaguasu vae oicuaata iporogüirovia ipírata co

¹² Toyerovia jocuae mbaembae omboavai vae ou chupe yave ipiaguasu vae. Echa oicuaata iporogüirovia ipírata co jare oñemeeta chupe tecove opa mbae vae. Echa ñandeYa güírocuvée omee vaera tecove opa mbae vae opaete oaíu vae reta pe. ¹³ Oime yave quia yavai yae chupe oico cavi vaera Tumpa cotí vae, jare jocuae jeco pegua oipota yave oyapo mbaeyoa, agüíye tei: Tumpa oipota ayapo vaera mbaeyoa. Echa Tumpa mbaeti etei oipota oyapo mbaeyoa. Jae ramiño vi mbaeti etei oipota quia oyapo vaera mbaeyoa. ¹⁴ Erei metei ñavo iñemongueta icavi mbae vae rupi oipota oyapo mbaeyoa. Echa jocuae mbaeyoa icavi echa chupe oyapo vaera. ¹⁵ Ñemongueta icavi mbae vae reta oyapouca mbaeyoa reta. Jare taicue rupi mbaeyoa oporoyuca.

¹⁶ Agüíye petavi, cheríví aaíu vae reta. ¹⁷ Tumpa omee mbaembae ñandeve ipiacavi rambue, jare opaete omee ñandeve vae icavi yae co. Jae oyapo tembipe jare mbaeti etei oyepoepi. Je cuaeño ipiacavi ñandeve. ¹⁸ Tumpa oipota rambue,

ñandeapo tai retara ñee añete vae rupi, ñaneñono tee vaera iyeupeguara, mbaagüiye reta tenondegua vae reta Tumpa pe oñeñono tee rami.

Peyapo ñee peyeapisaca jese vae

¹⁹ Jae rambue, cherivi reta aaíu vae, metei ñavo toipota yae toyeapisaca, agüiye tiñee rai, agüiye tipochi rai. ²⁰ Echa pochi vae ngaraa oyapo jupi vae Tumpa oipota tei oyapo vaera vae. ²¹ Jae rambue peeya opaete pochii vae jare opaete icavi mbae vae. Jare perovia peñemomichi reve ñee pepia pe oñeñono vae. Echa jocorai yave, peñemboasaucata co.

²² Erei peyapo ñee peyeapisaca jese vae. Agüiye peyeapisacaiño jese. Echa peyeapisacaiño yave ñee re, peñembotaviiño co pei. ²³ Oime yave quia ñee oyeapisaca jese vae mbaeti oyapo vae - oyeapisacaiño jese - jae co yeechaca pe omae iyee vae rami. ²⁴ Yepe tei omae ma iyee, erei joco güi ojo rupive iñacañi oyeecha vae güi. ²⁵ Erei oime yave quia jecuaeñö mborooócuai icavi yae vae oporoyora vae re oyeapisaca cavi vae, mbaeti yave iñacañi oyapo vaera mborooócuai jeigüe oyeapisaca jese güire, Tumpa omovendiseta oyapo rambue.

²⁶ Oime yave quia mbaembae oyapo vae rupi Tumpa pe oyeócuai echa vae, toñeandu cavi mbae jei vae re. Echa mbaeti yave oñeandu cavi mbae jei vae re, oñembotaví co oi, jare mbaembae oyapo vae mbaeti etei omboyerovia Tumpa. ²⁷ Añetete yaipota yave yayapo mbaembae yayeócuai vaera ñandeRu Tumpa pe, yaja yapou guacha reta jare cuña imemano vae oiporara ñogüinoi vae reta piri,

jare agüiye yayapo icavi mbae vae oporogüirovia
mbae vae reta oyapo vae.

2

Oicocatu vae reta jare paravete vae reta

¹ Cherivi reta, pe reta perovia ñandeYa Jesucristo re. Jae oñemboeteuca ma. Jae rambue agüiye peiparavo pemboete vaera oicocatu vae reta jare peroiro vaera paravete vae reta. ² Güiramoi oiqueta peñemboatia pe cuimbae oicocatu vae jare cuimbae paravete vae. Cuimbae oicocatu vae jemimonde ipora yae jare güinoi ipoacavera oro pegua vae. Erei cuimbae paravete vae jemimonde indechi yae. ³ Pemae cavi yave jemimonde ipora yae vae re jare pere yave chupe: Eguapi cuae pe. Cuae tenda icavi co; jare pere yave paravete vae pe: Eñemboi joco pe; ani: Eguapi ivi pe, ⁴ pemboete co pei jocuae oicocatu vae jare peroiro co pei paravete vae. Mbaeti icavi jocorai peporojaaa vaera. Icavi mbae co peñemongueta.

⁵ Peyeapisaca cheré, cherivi reta aaiu vae. Tumpa oiparavo paravete vae reta oicocatu vaera iporogüirovia re jare güinoi vaera imbaera iporoocuaia pe. Echa jocuae Tumpa güirocuavee opaete oaíu vae reta pe. ⁶ Erei pe reta peroiro paravete vae reta. Peicuaa co quirai oicocatu vae reta oñemombae pembaembae re jare oñeapo peré. ⁷ Tumpa peparavo Jesucristo jee re. Erei peicuaa co quirai oicocatu vae reta jei icavi mbae vae jocuae jee icavi vae cotí.

⁸ Tumpa iñee pe oyecuatía oi corai:
Eaíu iru vae nde reyeaíu rami.

Cuae co jae mborooócuai Tumpa iporoocuaia pegua. Peyapo yave cuae mborooócuai, peyapo co icavi vae. ⁹ Erei peiparavo yave pemboete vaera oicocatu vae reta jare peroiro vaera paravete vae reta, peyapo mbaeyoa. Echa mborooócuai oicuaucha peve peyaví co mborooócuai. ¹⁰ Oime yave quia opaete mborooócuai jeigüe oyapo cavi vae, metei oyaví yave, oyaví ma opaete mborooócuai. ¹¹ Mboroócuai pe oyecuatiá oi corai:

Agüiye eñuvanga menda re.

Erei jae ramiño vi oyecuatiá oi corai:

Agüiye eporoyuca.

Güiramoi nde mbaeti reñuvanga menda re. Erei reporoyuca yave, reyaví ma mborooócuai. ¹² Tumpa peraata mborooócuai oporoyora vae rupi. Jae ram-bue pemiari cavi jare peyapo icavi vae. ¹³ Echa oime yave quia mbaeti iru vae oiparareco vae, Tumpa ojaata oiparareco mbae reve, yepe tei Tumpa oporoparareco oyerovia reve oporojaa yave.

Mborogüirovia jare mborooócuai jeigüe

¹⁴ Güiramoi quia jei güinoi co mborogüirovia, erei mbaeti oyapo mborooócuai jeigüe. Jocorai yave, iporogüirovia mbaeti co mbae. Ngaraa oñemboasaуча iporogüirovia rupi. ¹⁵ Güiramoi metei periví ani metei pereindi mbaeti güinoi jemimondera jare jembiura. ¹⁶ Pere yave chupe: Ecua ndepiacatu reve. Nderacu catu jare nerivata, erei mbaeti yave pemee chupe mbaembae oata chupe vae, jocuae pere vae mbaeti co mbae. ¹⁷ Jae ramiño vi mbaeti yave peyapo mborooócuai jeigüe,

jaeño mborogüirovia penoi, jare jocuae mbaeti co mbae.

¹⁸ Güíramoi quia jeita: Nde rere renoi co mborogüirovia jare che jae ayapo mboroócuai jeigüe. Nde mbaeti ndepuere reicauaca cheve ndeporogüirovia. Echa mbaeti reyapo mboroócuai jeigüe. Erei che aicuaucata ndeve cheporogüirovia mboroócuai jeigüe ayapo vae rupi. ¹⁹ Nde rerovia oime co meteiño Tumpa. Icavi co jocuae rerovia vaera. Erei aña reta vi güírovia jocuae. Erei jae reta oriri oquiyé güi. ²⁰ Nde co jae mbaeti iyaracuua vae. ¿Reipota pa aicuaucuvaera ndeve quirai ndeporogüirovia mbaeti co mbae, mbaeti yave reyapo mboroócuai jeigüe? ²¹ Nemaendúa ñanetenondegua Abraham re. Jae oñembojupiça oyapo vae re, güírocuvavee tai Isaac Tumpa pe güírocuvaveea pe yave. ²² Ndepuere reicuaa quirai Abraham iporogüirovia oyapouca chupe Tumpa jei chupe oyapo vaera vae. Abraham oyapo vae oicuaucu icavi yae co iporogüirovia. ²³ Jare oyeapo Tumpa iñee pe oyecuatía oi vae. Echa oyecuatía oi corai:

Abraham güírovia Tumpa, jare Tumpa ombojupi iporogüirovia jeco pegua.

Jare Abraham oñembojee Tumpa iamingo pe.

Jocorai oyecuatía oi. ²⁴ Jae rambue pepuere peicuaa quirai Tumpa ombojupi mboroócuai jeigüe oyapo vae. Mbaeti ombojupi mborogüiroviaño güínoi vae.

²⁵ Jae ramiño Rahab aguasa rupi oico vae oñembojupiça oyapo vae re, Israel pegua Josué omundo vae reta re omaeño opita vaera jo pe yave jare omundo ye ambué tape rupi yave.

²⁶ Metei jete tecove mbaeti güïnoi vae omano ma co. Jae ramiño vi ndeporogüirovia mbaeti co mbae, mbaeti yave reyapo mborooócuai jeigüe.

3

Ñanecu

¹ Cheriví reta, agüiye peipota opaete peyeapo vaera oporomboe vae retara. Echa peicuaa quirai oporomboe vae reta oyaví yave, oñemboeco yae iru vae reta güi. ² Echa ñande opaete yayavi. Oime yave quia mbaeti oyaví mbae jei vae re vae, jae icavi yae co. Jocuae nunga güïnoi mbaepuere opaete jete re. ³ Mase, ñañono cavayu reta iyuru pegua iyuru pe, jae reta yogüiraja vaera yaipotaa cotí. Jocorai ñandepuere yarovarova cavayu reta. ⁴ Jae ramiño vi yepe tei buque reta tuicha yae jare yepe tei amo pe ivitu tanta vae güiraja i guasu rupi, yepe tei buque güirovaa michi yae, erei piye buque iñangarecoa ipuere güirovarova buque jae oipotaa cotí. ⁵ Jae ramiño vi ñanecu michi co, erei piye ñandepuere ñañemboete yae.

Metei tata ipuere oapi jeta caa reta, yepe tei michi yae. ⁶ Jare ñanecu metei tata rami co. Oyapouca jeta yae icavi mbae vae. Yepe tei ñanderete pegua co, erei oyapo icavi mbae vae opaete ñanderete pegua pe. Echa tata mbaembae oapi rami, ñanecu ñanembopochi. Jare cuae icavi mbae vae ou cañitei güi etei. ⁷ Ivi pegua reta omomaso ma oipotagüe maemimba reta, jare güira reta, jare mboi reta, jare jevae i rupigua reta. Güïnoi reta mbaepuere omomaso vaera. ⁸ Erei mbaeti etei ñandepuere ñamomaso ñanecu. Mbaeti

ñandepuere jese. Jecuaeño oyapouca ñandeve jeta yae icavi mbae vae. Imbayachi yae vae rami co. ⁹ Ñanecu pe ñamboete ñandeRu Tumpa. Jae ramiño vi ñanecu pe yayepopeyu iru vae reta re, yepe tei Tumpa oyapo reta jae etei rami. ¹⁰ Ñanecu pe ñamboete Tumpa jare yayepopeyu iru vae reta re. Cheriví reta, mbaeti icavi yayapo vaera corai. ¹¹ Icavi vae jare i iro vae mbaeti etei ipuere oe metei i jesai vae güiño. ¹² Iva mbaeti etei ipuere omee saini reta. Jae ramiño vi uva mbaeti etei ipuere omee i va reta. Jae ramiño vi metei i jesai vae mbaeti etei ipuere omee i icavi vae jare i iro vae.

Peyerure Tumpa pe aracuaa re

¹³ Oime yave quia pepite pe iyaracuaa vae, toico cavi. Jocorai yave, icavi vae oyapo vae oicuaucata quirai iyaracuaa co oñemomichi reve. ¹⁴ Erei peñemoagüiro yave iru vae reta re jare pepochi yave chupe reta, agüiye peñemboete. Echa peñemboete yave, peapu pei co. Mbaeti peyapo pei añete vae rupi. ¹⁵ Jocorai peyapo yave, mbaeti peyerure pei Tumpa pe omee vaera peve aracuaa. Peico oporogüirovia mbae vae reta yogüireco rami. Peico peremimbota reño. Peico aña reta yogüireco rami. ¹⁶ Echa peñemoagüiro yave iru vae reta re jare pepochi yave chupe reta, peñorarota oyouri jare peyapota opaete mbae icavi mbae vae. ¹⁷ Erei peyerure yave Tumpa pe omee vaera peve aracuaa, ngaraa peyapo pochii vae. Pepiacatuta co. Pepiaguasuta co. Peyapota co Tumpa oipota peyapo vaera vae. Peipararecota co opaete vae. Pepiacavita co. Pepirata co peporogüirovia re. Ngaraa peporombotavi. ¹⁸ Pe

reta penoi yave mbiacatu, peico pepiacatu reve.
Jocorai yave, peyapota jipi vae.

4

Cuae ivi pegua iamingo oyovaicho Tumpa ndive

¹ ¿Maera pa peñoraro oyouri? Tamombeu peve. Peñoraro oyouri, peremimbota reta oñoraro ñogüinoi pepia pe rambue. ² Peipota tei mbaembae, erei mbaeti penoi. Peporoyuca jare jecuae peipota tei mbaembae, erei mbaeti pepuere penoi. Peñoraro oyouri. Erei mbaeti penoi, mbaeti peyerure Tumpa pe jese rambue. ³ Peyerure mbaembae re Tumpa pe, erei jae mbaeti omee peve. Mbaeti peyerure cavi. Echa peyerure mbaembae re pemongata vaera peremimbota reño. ⁴ Pe reta menda re oñuvanga vae reta rami co. ¿Mbaeti pa peicuaa quirai cuae ivi pegua iamingo oyovaicho Tumpa ndive? Jae rambue peipota yave peyeapo ivi pegua iamingora, peyeapota co Tumpa jobaichora. ⁵ Añete vae co cuae Tumpa iñee pe oyecuatía oi vae:

Espíritu Santo ñandepia pe oico vae ñanderaiu yae. Jocorai oyecuatía oi. ⁶ Erei Espíritu Santo omee ñandevejeta yae ipiacavi. Echa Tumpa iñee pe oyecuatía oi corai:

Tumpa oyovaicho oñemboete vae reta ndive.

Erei omee ipiacavi oñemomichi vae reta pe.

Jocorai oyecuatía oi.

⁷ Jae rambue peyapo Tumpa oipota peyapo vaera vae. Peñoraro aña guasu ndive, jare jae ootecuaraita pegüi. ⁸ Peysa Tumpa re jare Tumpa oyata peré. Pe reta co jae iyoa vae reta. Agüiye

mo peyapo pochii vae. Peyoe pepia agüiye vaera penoi ñemongueta icavi mbae vae. ⁹ Pepiatiti jare peyao. Pepiatiti pepuca vaeragüe. Pepiatiti yae peyerovia vaeragüe. ¹⁰ Peñemomichi ñandeYa jóvai, jare jae pemboeteucata.

Agüiye pere icavi mbae vae oyocoti

¹¹ Cherivi reta, agüiye pere icavi mbae vae oyocoti. Oime yave quia jei icavi mbae vae tivi coti vae, ojaa co oi tivi. Jocuae nunga jei oi icavi mbae vae mborooçuai coti jare ojaa co oi mborooçuai. Erei rejaa yave mborooçuai, mbaeti reyapo mborooçuai jeigüe. Jaeño rejaa mborooçuai. ¹² Jaeño Tumpa omee mborooçuai jare ipuere oporojaa. Jae ipuere oporomboasa jare ipuere oporomboai. Nde mbaeti etei ndepuere reporojaa.

Mbaeti peicuaa mbae ra oyeapota piareve

¹³ Peñemongueta michi pegua. Echa pe reta pere corai: Añave ani piareve yajata jocuae tenta pe, jare yaicota joco pe metei año pegua. Yaguata mbaembae jare ñameeta mbaembae ñamongana vaera corepoti. Jocorai pere. ¹⁴ Erei pe reta mbaeti peicuaa mbae ra oyeapota piareve. Mbaeti peicuaa oimeta ra pei piareve. Echa perecove iviti rami co. Oyecuaa michi peguaño. Jayave imambae mbaeti ma oi. ¹⁵ Jae rambue pereta tei corai: ÑandeYa oipota yave, yaicota joco pe jare yayapota jocuaecuae. Jocorai pereta tei. ¹⁶ Mbaeti yave pere jocorai, peñemboete co pei pe reta etei peyapota vae re. Jare jocorai peñemboete yave, peyapo icavi mbae vae.

¹⁷ Jae rambue peicuaa yave mbae icavi peyapo vaera vae, mbaeti yave peyapo, mbaeyoa co peyapo.

5

Oicocatu vae icavi mbae vae oyapo vae reta

¹ Peñemongueta michi pegua, peicocatu vae reta. Peiporara yaeta co. Jae rambue peyao pesapúcái reve. ² Jeta yae penoi vae mbaetita mbae jepí, jare cupii reta güirocomeguata peremimonde ipora yae vae reta. ³ Oro jare corepoti penoi vae opata iyuquirí. Jare jocuae oicuaucata pe reta peyapo co icavi mbae vae. Jae rambue peiporarata co, tata ñandesoo oapi yave yaiporara rami. Peicocatu co. Erei ngaraa penoi ara reta peyerovia vaera jeta yae penoi vae re. ⁴ Mase, oparavíqui peve vae reta omkaarivo peco reta pe, erei mbaeti pemboepí chupe reta. Jae reta iñeengueta peve. Jare ñandeYa oendu ma quirai iñeengueta peve jocuae omkaarivo vae reta. ⁵ Cuae iví pe peico rambueve, peu jeta tembiú icavi vae jare peiporu pecorepoti peyapo vaera jeta icavi mbae vae. Peñemonguira ma co. Erei imambae pemanota. ⁶ Pe reta pemboeco jocuae jupi vae jare peyucá vi. Jare jae mbaeti ipuere oyeepí pegüi.

Pepiaguasu jare peyerure Tumpa pe

⁷ Jae rambue, cherívi reta, pepiaguasu ñandeYa ou ye regua. Tamojaanga omaeti vae. Omaeti güire, oaro ima güinoi vaera mbaarivo. Ipiaguasu yae. Echa oquínói yave, temiti ocuacuaa jare

yagüiye. ⁸ Jae ramiño vi pe reta pepiaguasu. Je-
cuaeño peñemoatangatu. Echa oyearo ma ñandeYa
ou ye vaera.

⁹ Agüiye peñeenguru oyouse, cherivi reta. Echa
peñeenguru yave oyouse, peñemboecota. Echa
oporoja vae imambae outa ovae. ¹⁰ Cherivi reta,
peñemongueta Tumpa iñee aracae omombeu vae
reta re. Jae reta imiari iru vae reta pe ñandeYa
jee re. Jae reta oicauaca ñandeve quirai yaiporara
yave, icavi co ñamoaguata vaera ñandepiaguasu
reve. ¹¹ Añete co, ñande yae oyerovia ma co jo-
corai omoaguata vae reta. Peicuua co quirai Job
ipiaguasu yae, jare quirai ñandeYa omovendise
yae taicue rupi. Echa ñandeYa ñanderaiu jare
ñandeparareco yae.

¹² Ere, cherivi reta, agüiye pere corai: Mbaeti
yave corai ayapo, toyapo icavi mbae vae cheve
ara. Jae ramiño vi agüiye pere corai: Mbaeti
yave corai ayapo, toyapo icavi mbae vae cheve
ivi. Agüiye etei pere jocorai. Oime yave quia
añete vae jei peve vae, pere chupe: Añete vae co
rere. Jae ramiño vi oime yave quia iyapu peve vae,
pere chupe: Ndeapu co. Mbaeti yave pere jocorai,
peñemboecota co.

¹³ ¿Oime pa quia pepite pe oiporara oi vae?
Toyerure Tumpa pe. ¿Oime pa quia pepite
pe oyerovia vae? Tomboete Tumpa canta pe.
¹⁴ ¿Oime pa quia pepite pe imbaerasi vae? Toeni
oporogüirovia vae reta itenondegua reta. Jayave
jae reta toñono aceite imbaerasi vae iñaca re
ñandeYa jee re, jare toyerure Tumpa pe jese. ¹⁵ Jare
mborogüirovia reve oyerozure reta yave, imbaerasi
vae ocuerata. Echa ñandeYa ombogüerata. Jare

imbaerasí vae oyapo yave mbaeyoa reta, Tumpa iñirota chupe jese reta. ¹⁶ Peyoa yave oyocotí, pemombeu oyoupe. Jayave peyerure oyoē Tumpa pe, Tumpa pembogüera vaera. Metei jipi vae oyerure yave ipia reve, Tumpa oyapota jeta yae chupe. ¹⁷ Elías co jae metei ivi pegua ñande rami. Erei jae oyerure ipia reve Tumpa pe agüiye vaera oqui. Jare mbaeti etei oqui mboapi año jare seis yasi. ¹⁸ Jayave Elías oyerure ye Tumpa pe jare oñemboipi oqui jare temiti ocuacuaa ye.

¹⁹ Cheriví reta, oime yave quia pepite pe añete vae oyaví vae, jare iru vae omborí yave güirovia ye vaera añete vae, ²⁰ peicuaa cuae: Jocuae oporombori vae oepi oyaví vae jecove mano güi, jare jocorai ombori rambue, Tumpa iñirota oyaví vae pe opaete imbaeyoa reta re.

**Nuevo Testamento Guaraní Pe
New Testament in Guaraní, Eastern Bolivian
(BL:gui:Guaraní, Eastern Bolivian)**

copyright © 2012 Wycliffe Bible Translators, Inc.

Language: Guaraní, Eastern Bolivian

Translation by: Wycliffe Bible Translators, Inc.

Guaraní, Eastern Bolivian [gui], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guaraní, Eastern Bolivian

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files
dated 29 Jan 2022
577acc2d-2f51-5700-8a70-613f34a2faba